

15. maj 2017

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angajoqqaanut atuarfik aallartinneqassaaq 1. juuli 2018-mi.

(Inatsisartunut ilaasortaq Nivi Olsen, Demokraatit)

Inatsisartunut ilaasortap Nivi Olsennip aalajangiiffigisassatut siunnersuutaanut Siumumiit imaattumik oqaaseqassaagut.

Siumumiit pingaartittuarparput inuit kiffaanngissuseqarlutik ineriartornissaminnut pisinnaatitaaffeqarnerat ataqqineqassasoq, upperaarpullu pisinnaatitaaffitsik atorlugu ilaqtariinnik nukittuunik pilersitsinissaq tamanit siunnerfiujuartoq.

Upperaarput assigiinngisitaarnerup nukik pitsaasoq pilersittaraa, assigiinngisitaartunillu ilaqtariittut naleqartitaqartarnitsigut inuiaat nukittuut pilersinneqartartut. Siunnersuuteqartup angajoqqaat atuarfiannik pilersitsinissamut qulequttat tikitai iluatinnaateqartutullu ilaliiffigiumasavut tassaapput ataatsimoorussamik naleqartitatsinnut tunngasuni utoqqartatsinnik peqataatitsineq annertunerujussuusariaqartoq, taamatullu oqariartuuteqarneq meeqqat atuarfianni atorluarneqarsinnaasoq atuarfeqarfinnut kaammattuutigerusukkatsigu. Oqartarpugut meeqqat atuarfiat kinguaariit ilisimasaanik ingerlatitseqqiffiusoq, tassuunakkullu utoqqartavut annertoorujussuarmik tunniussassaqarnerat atorluarneqartariaqartoq isumaqarfigaarput.

Ileqqorissaarnek qanorlu pitsaasumik pissuseqarneq naleqartitat aallaavigalugit assigiinngissinnaasaqisut immikkullu ataqqineqarlutik inissaqartinneqassasut pingaartipparput, taamatullu oqaaseqarluta nalunngilluarparput ilaqtariippassuaqarmat tulaaveqarnissamut tapersersorteqarnissamullu pisariaqartitsisunik, kikkulluunniimmi angajoqqaanngorsimasut nalunngilaat meerartaarnek qanoq inuunermut allanngortitsitigisarmat tapersersorteqarnissallu qanoq pingaartiginera.

Naalakkersuisut akissuteqaatiminni ersarissaavigaat siunnersuutigineqartup angujumasai maanna Naalakkersuisoqarfimmit suliarineqarmata UKA 2017 saqqummiunneqassallutik, tassalu angajoqqaanngorlaani Peqqissutsimut Pitsaaliuinernullu Aqutsisoqarfiup ataaniittumit annertusaanissaq. Neqerooruteqarneq mikisunut meerartalinnut meeqqap marlunnik ukioqalernissaata tungaanut neqeroorsinnaaneq anguniarneqarluni, ullumikkut meeqqap arfineq sisamanik qaammateqalernissaata tungaannut neqeroorutaasut annertusarlugit.

Suliniutip annertusarneqarnissaanut qilanaarluta Naalakkersuisut siunnerfigineqartoq suliaralugu aallartereersimammasuk siunnersuutip itigartitsissutigineqarnissaa innersuussutigaarput.

Vivian Motzfeldt - Siumut